

## La lejenda de Turchia a Moena

Te Turchia, un di ciantons più carateristics de Moena, dai 9 ai 11 de aost l'è stat endrezà 3 dis de festa, olache se à podù respirèr l'atmosfera de la cognosciuda lejenda del sudà turch ruà famà e destrametù te paisc e rencurà dai sentadins. La sociasions del paisc, a una con desvaliva autres de la val tel segn de na bela colaborazion, les à endrezà 21 stand, con musega, magnadiva tradizionèla e intrategniment e daite di tobié se à podù mirèr l'opera de scultores e artejegn.

L'è jit dut n mulge ben – à dit la presidenta del Comitaz Manifestazion Ilaria Petrone – e ence l temp à aidà. Chest an l'è stat dorà amò l'inom «Turchia» percheche la jent del cianton la ge tegnia. Turisc turches n'era istesc ma chesta oita no l'è stat nesciun problem.

Te trei dis l'è tout pèrt presciapèch 2000 persones e l'è stat n centené i voluntadives del post e de la val che se à dat jù per l bon ejit de la festa e ence per fèr benefizenza. CRIM



*Ti tobié se à podù veder sacotenc scultores e artejegn al lurier.*



*I voluntadives è stac l'ènama de la Festa de Turchia.*